

04 IULIE
PR.ILIE TETERKO

PARACLISUL
SF.MUCENICI
ROMANOVI
DE LA
MOSCOVA



ODESSA, 2006



**Канон молебный
святым царственным
страстотерпцем: императору
Николаю, императрице
Александре, царевичу Алексию,
великим княжнам Ольге, Татиане,
Марии, Анастасии**

Посем Бог Господь: во глас 4 со стихи.

Таже тропарь, глас 4:

Днесь благовернии людие, светло почтим / седмерицу
честную царственных страстотерпец. / Христову
едину домашнюю церковь: / Николая и Александрю, /
Алексия, Ольгу, Татиану, Марию и Анастасию. / Тии
бо, уз и страданий многоразличных не убоявшеся, / от
богоборных смерть и поругание телес прияша / и
дерзновение ко Господу в молитве уллучиша. / Сего
ради к ним с любовию возопим: / о святии
страстотерпцы, / гласу покаяния и стенанию народа
нашего вонмите, / землю Российскую в любве к
Православию утвердите, / от междоусобных брани
сохраните, / мир мирови у Бога испросите / и душам
нашим велию милость.

2 лик поет тойже тропарь.

1 лик: Слава, и ныне: Богородичен, глас тойже:

К Заступнице страны нашея, / Приснодеве
Богородице притецем / и к первописанней иконе Ея
ныне припадем, / с верою зовуце из глубины души: /

о Мати Божия, спаси землю Русскую, / исцели
сокрушение ея / и верныя люди утеши.

Псалом 50

Канон страстотерпцем, глас 8. Поем же его без
ирмосов на 4.

Песнь 1. Ирмос: Воду прошед:

Любовию повергаеми, к вам, святии мученицы,
припадаем, просяще от бед лютых избавления.

Печали многия обуревают души наша, избавите от
сих нахождения, святии, молитвами теплыми
вашими.

Слава: Сердца и души наша утвердите в любви
Божией, страстотерпцы царственнии, да царствует в
нас ум Христов.

И ныне: Возри на Землю Русскую, Богородице
Владычице, и от бед всеразличных избави чада Твоя.

Песнь 3. Ирмос: Небеснаго круга:

Дивнии исповедницы имене Христова, подвигом
жизни вашей направите нас ко пристанищу
спасения.

Бурю смущений велиих и соблазнов в Отечестве
нашем укротите молитвами вашими, приснии
заступницы наша.

Слава: Веру Православную непреобориму соблюдайте и
благочестие в Державе вашей насадите, царственнии
покровителие наша.

И ныне: Покровом Твоея благости, Пречистая, покрый
землю нашу страждущую, исцели язвы богоборческия
и верныя люди утеши.

Посем священницы и оба лика вкупе поют катавасию:

Молите Бога о нас, / святы царственнии
страстотерпцы, / яко мы усердно к вам прибегаем, /
скорым помощником и молитвенником о душах
наших.

Призри благосердием, Всепетая Богородице, / на мое
лютое телесе озлобление / и исцели души моя
болезнь.

Ектения: Помилуй нас, Боже: **и седален, глас 2:**

Моление теплое принесите Владыце Господу, /
чудотворцы славнии и прехвальнии страдальцы, / да
ходатайством вашим / вера Православная во
Отечестве нашем утверждается / и Церковь Божия
именами святых красуется / во спасение наше и
обновление.

Песнь 4. Ирмос: *Услышах, Господи:*

Незлобием и кротостию своею богоборцем
противостояще, царю преславне Николае, за враги
молился еси и нас молитвами твоими в братолюбии и
смирении утверди.

Дерзновение велие стяжавшии у Спаса Христа,
призывающим вас на помощь скорые услышателие и
помощницы явитесь, прелюбезнии.

Слава: Житейских скорбей и болезней телесных
врачеве показалися есте, молитвенницы наша
всеусерднии, тако и нас избавите от сих нахождения.

И ныне: Исцели, Пречистая, душевныя наша немощи
и страсти телесныя, поспеши, о Госпоже, здравие
подати, Врача всем рождшая, Христа.

Песнь 5. Ирмос: Просвети нас:

Веры Православныя поборницы и благочестия отеческаго блюстителие, супружества христианскаго правило, домашния церкви образе: прославляем вас, святии.

Добродетельнаго корене благокрасныя леторасли явились есте царственныя дети, светом доброт ваших озарите души наша.

Слава: Землю Русскую любовью своею покрывающии и теплыми молитвами люди ваша соблюдающии, не престайте нас миловати, страсотерпцы славнии.

И ныне: Обрати, Мати Божия, сердца людей к Сыну Твоему и Богу нашему, да сердцем очищенным познают, яко Той есть Любовь Присносущная.

Песнь 6. Ирмос: Молитву пролию:

От бездны страстей и рабства грехолюбиваго свободите нас, мученицы венценоснии, да купно с вами славословим Господа.

Ходатаи к Богу о нас усерднии, воззрите на Отечество ваше земное: утишите раздоры братския, расточенныя люди соберите, да едиными усты и сердцем славословим Троицу Живоначальную.

Слава: В скорбех и печалех утешителей вас обретаем, святии, скорую ослабу и от бед избавление, таже исцелений источник неоскудевающий.

И ныне: Унынием спящих и грехом покровенных к покаянию нас, Пречистая, призови, яко Мати Слова.

Священницы и оба лика вкупе поют катавасию, якоже выше указася по 3-й песни: Молите Бога о нас: Призри благосердием: Таже ектения малая.

Кондак, глас 6:

Предстателие Отечества нашего всеусерднии, / молитвенницы о людех теплейшии, / славнии и добропобеднии страстотерпцы царственнии, / не презрите воздыханий наших сердечных, / но прострите молебне руцы ваша, / оградите нас от всякаго зла, / исцелите недуги душевныя и телесныя, / ходатаи о всех любовью почитающих вас.

Прокимен, глас 4: Пролияша кровь их, / яко воду. **Стих:** Вменихомся, яко овцы закления. **Всякое дыхание:** Евангелие от Матфея, зачало 36.

Слава: Молитвами святых царственных страстотерпцев, / Милостиве, очисти / множество согрешений наших.

И ныне: Молитвами Богородицы, / Милостиве, очисти / множество согрешений наших.

Помилуй мя, Боже, по велицей милости Твоей / и по множеству щедрот Твоих / очисти беззаконие мое.

Стихира, глас 6:

Союзом любве Христовы связуеми, / седмочисленнии царственнии страстотерпцы, / поношения и убиения не убоявшеся, / первии, яко новомученицы, / за Русь Святую от безбожных пострадасте / и образ исповедничества и ревности по Бозе / верным людем покажете. / Темже, земли русския / покровителие неусыпаемии явльшеся, / Триединого Бога

непрестанно молитесь / о спасении Отечества нашего / и всех с любовью вас почитающих.

Посем глаголет диакон молитву: Спаси, Боже, люди Твоя: **Лик:** Господи, помилуй, **12 раз.** **Возглас:** Милостию и Щедротами:

Песнь 7. Ирмос: От Иудеи дошедше:

Покаяния народа нашего будете ходатаи, да отвратившися от путей нечестия, с вами возопиим Христу Спасу: отец наших Боже, благословен еси.

Терпением своим, всехвальнии мученицы, злобу вражию победили есте и, кровию своею порфиру царственную очервленивше, возшли в Небесныя селения, идеже поете: отец наших Боже, благословен еси.

Слава: Мир Христов испросите душам нашим, незлобивии агнцы, чашу исповедничества и страданий за Христа вкупе с народом вашим испившии. Мы же, взирающе на подвиги ваша, зовем: отец наших Боже, благословен еси.

И ныне: Богородице Дево, Мати Преподобная Спасителя нашего, умири жизнь нашу, да во след заповедей Господних грядуще, умильно зовем: отец наших Боже, благословен еси.

Песнь 8. Ирмос: Царя Небеснаго:

Царя Небеснаго служителие достославнии явились есте и помощницы скорые превозносящих Христа во веки.

Изнемогающим нам от соблазнов многих утверждение в вере и благочестии испросите, всеблаженнии,

поющим вас и превозносящих Христа во веки.

Слава: Благодати и покровительства вашего просящих не отвержите, богоноснии мученицы, славословящих с вами Христа во веки.

И ныне: Страстей и болезней находы отгоняеши от нас, Дево Богородице, славословящих Сына Твоего и Спаса нашего во веки.

Лик: Хвалим, благословим, покланяемся Господеви, поюще и превозносяще Его во веки.

Ирмос: Царя Небеснаго, / Егоже поют вси ангельстии, / хвалите и превозносите во вся веки.

Песнь 9.

Ирмос: Воистину Богородицу Тя исповедуем, / спасеннии Тобою, Дево Чистая, / с безплотными лики Тя величающе.

Молитвы наша примите, мученицы всехвальнии, и в добродетельном жительстве утвердите нас, избавляюще от зол и напастей.

Увенчаннии небесною славою, боголюбезнии исповедницы, нам испросите причастие вашей присносущныя радости.

Слава: Трисиянне Владыко Господи, просвети нас блистанием подвигов добровольных страдальцев царственных, сынами Света Своего содеявая.

И ныне: Не отступи от нас, Дево Благословенная, денно и ночью воспевающих Тя, но предвари и избави от всякия скорби и печали.

Таже за Достояно: лик поет стих сей, глас 8:

Владычице, прими молитвы раб Твоих / и избави нас от всякия нужды и печали. / Ты еси, Богородице, оружие наше и стена, / Ты еси Заступница, и к Тебе прибегаем, / Тя и ныне на молитву призываем, / да избавиши нас от врагов наших. / Возвеличим Тя вси, / Всенепорочную Матерь Христа Бога, / Юже осени Дух Пресвятый.

Таже стихиры, глас 8.

Боговенчанне царю Николае, / клеветы, злобу, мучение и смерть претерпевый, / непоколеблем явился еси богоборными ополченьми, / венец Небесный от Христа Бога приял еси / и ныне ходатайствуеши о любовьию почитающих тя.

От лютеровы веры / пришла еси во ограду Церкви Православныя / и новое Отечество твое и люди / от Бога тебе врученныя сердечне возлюбила еси, / святая царице Александро, / от рук Христовых с венцем царским / крест исповедничества прияла еси. / Сего ради чтим тя, молитвеннице наша теплейшая.

Возвеличим песньми хвалебными / четверицу дев святых: / Ольгу, Татиану, Марию, Анастасию / вкупе со отроком мужеумным Алексием, / воином Христовым неодоленным, / царствующим со Спасом Господом во веки.

Посем Трисвятое: Отче наш: Тропарь святым, глас 4:

Ко святым исповедником веры Православныя, / страстотерпцем царственным усердно припадем, / благочестно зовуще из глубины души: / славословие наше, святии, примите, / вонмите воздыханием

нашим сердечным, / потщитесь избавитися нам от
належащих скорбей, / притекающим ко крову
вашему, славнии.

Слава, и ныне, Богородичен, глас тойже:

С Вышних призирая, убогия приемля, / посети нас,
грехов ради наших скорби терпящих, / Владыко
Всемиловитиве, / молитвами Богородицы и всех
святых русских / даруй земли нашей велию милость.

Ектеня сугубая, юже глаголет диакон с кадилом.

Возглас: Услыши ны, Боже: **Посем возглашает диакон:**
Ко святым царственным страстотерпцем
помолимся. **Лик:** Святи царственнии страстотерпцы,
молите Бога о нас.

И четет предстоятель молитву сию:

О святой страстотерпче царю мучениче Николае!
Господь ты избра помазанника Своего, во еже
милостивно и право судити людем твоим и
хранителем Церкви православныя быти. Сего ради со
страхом Божиим царское служение и о душах
попечение совершал еси. Господь же, испытуюя тя, яко
Иова Многострадальнаго, попусти ти поношения,
скорби горькия, измену, предательство, ближних
отчуждение и в душевных муках земнаго царства
оставление. Вся сия ради блага России, яко верный
сын ея, претерпев, и, яко истинный раб Христов,
мученическую кончину приемь, Небеснаго Царства
достигл еси, идеже наслаждаешия Вышняя славы у
Престола всех Царя, купно со святою супружницею
твоею царицею Александрою и царственными чады

Алексием, Ольгою, Татианою, Мариєю и Анастасиею. Ныне, имея дерзновение велие у Христа Царя, моли, да простит Господь грех отступления народа нашего и подаст грехов прощение и на всякую добродетель наставит нас, да стяжим смирение, кротость и любовь и сподобимся Небеснаго Царствия, идеже купно с тобою и всеми святыми новомученики и исповедники Российскими прославим Отца и Сына и Святаго Духа, ныне и присно и во веки веков. **Аминь.**

И прочая по обычаю. И отпуст. Таже поем стихиру на целование образа, глас 8.

Подобен: О, преславнаго чудесе:

О, преславнаго чудесе! / Святии царственнии страстотерпцы седмочисленнии, / в годину страданий за Христа / сохраниша любовь и верность Ему, / друг друга тяготы носяще / и тако исполняюще закон Его, / сего ради ныне на Небеси царствуют / и дерзновенно молятся / о спасении душ наших.

[Молебный канон святым Царственным страстотерпцам составлен протоиереем **Илией Тетерько, клириком г. Одессы. Воспроизводится по изданию: Канон молебный святым царственным страстотерпцем: императору Николаю, императрице Александре, царевичу Алексею, великим княжнам Ольге, Татiane, Марии, Анастасии. Одесса: Свято-Сретенский храм пос. Черноморка, 2006]**